



Innspel frå gjestebod om framtida til Lindås kommune

Namn på vert/vertinne: REIDAR KONGLEVOLL

Kommuneplanen er todelt, og består av ein samfunnsdel og ein arealdel. Nett no jobbar vi med samfunnsdelen, som handlar om framtida til kommunen. Samfunnsdelen skal ta stilling til langsiktige utfordringar, mål og strategiar. Spørsmåla er kva type samfunn vil vi ha, og kva grep vi må ta for å kome dit?

I arbeidet med kommuneplanen har vi invitert innbyggjarar, næringsliv, frivillige lag og organisasjonar, råd og utval til å kome med innspel til åtte ulike tema:

1. Regionsenterutvikling
2. Industri og næring
3. Attraktive nærmiljø
4. Kultur og frivillig arbeid
5. Klima og miljø
6. Livsmeistring og fellesskap
7. Kommunale tenester
8. Samfunnstryggleik og beredskap

Vi vil ikkje styre kva de skal diskutere på gjestebodet og korleis de oppsummerer innspela. De kan notere stikkord undervegs eller samle alt i ein konklusjon eller eit samandrag etterpå.

Her kjem innspelet vårt:

Inn på tunet (IPT) er tilrettelagte og kvalitetssikra velferdstenester på gardsbruk. Tenestene skal gje meistring, utvikling og trivsel. Gardsbruk er ein eigedom som vert brukt til jord-, skog-, eller hagebruk. Aktivitetane i tenestetilbodet er lagt til garden, og knytt opp mot livet og arbeidet der.

Dei viktigaste brukargruppene er :

- barn og unge
- menneske med rusproblem
- innvandrarar
- eldre
- funksjonshemma

Send evalueringsskjemaet og innspela frå gjestebodet til line.thuen.waage@lindas.kommune.no!



I fleire planprosessar dei seinare åra har me prøvd å få Inn på tunet forankra i kommunalt planverk. Likevel har det så langt ikkje lukkast. Det er for oss ei gåte.

Optimistisk grip me no denne nye sjansen og heldt gjestebod me kaffi og noko å bita i, der tema er framtida til kommunen vår .

Me vil knyta IPT opp mot følgjande tema i samfunnsdelen:

B) Industri og næring .

For tilbydarane er Inn på tunet næring. Ein bonde driv si eiga verksemd med krav til produktkvalitet, økonomi og KSL (Kvalitetssikring i Landbruket) i samsvar med lovgiving innanfor næringa. Det er ein nasjonal strategi for utvikling innan landbruket å stimulera til at bonden skal utvikla nye og berekraftige produksjonar og tenester ut frå garden sine ressursar og bondens kompetanse. Inn på tunet er etter kvart vorte eit samlebegrep for slike ulike typar tenester, og er med og styrkjer næringsgrunnlaget på gardar.

C) Attraktive nærmiljø.

Lindås kommune er både Knarvik og Romarheim . Ein kommune som er god å bu har mangfald. Inn på tunet vil styrkja landbruket som næring og gjennom det vera med og skapa levande bygder og gode bumiljø. Lys i fleire fjøs kan vera ein del av ei positiv bygdeutvikling.

D) Kultur og frivilleg arbeid .

Kulturomgrepet er vidt og må femna om lag og organisasjonar som kulturberarar, men også landskap, språk, tradisjonar, handverk og handboren kunnskap. Inn på tunet er lagt til garden, og knytt opp mot livet og arbeidet der og formidlar og vidareutviklar lokal matkultur, historie og tradisjonar.

E) Klima og miljø.

Barn og unge i dag vil møta – og må løysa – framtida sine mest alvorlege utfordringar. Det gjeld innan klima, miljø, energi, reint vatn og matproduksjon. Då er det avgjerande at dei har kunnskap og forståing om økologi – og korleis fotosyntesen er grunnlaget for alt liv. Garden er ein unik pedagogisk arena der praktisk og teoretisk arbeid går hand i hand, og representerer derved også eit potensiale for kontekstuell læring. Altså å lære fagstoff i ein naturgitt samanheng, og gjennom aktive læringsprosessar.

F) Livsmeistring og fellesskap.

Å forstå dei grunnleggjande behov i livet er basis for ei god helse. Gjennom IPT- tiltak får deltakarane ta del, oppleve å meistra, sjå mening og samanheng. Dette oppnår ein ved å bruka garden og bygda sine ressursar.



G) Kommunale tenester.

Me ser at på nasjonalt nivå og i fylket er Inn på tunet eit satsingsområde. Den viktigaste kjøpar av IPT-tenester ,er kommunane. Lindås kommune har i meir enn 20 år hatt samarbeid med enkeltståande Inn på tunet gardar. Inn på tunet har i seg ressursar som er viktige for ein framtidsretta, inkluderande,tenestevillig og kvalitetsbevisst kommunal tenesteproduksjon. Ein aktiv bruk av Inn på tunet vil ha positiv verknad på samfunns-og næringsutviklinga i heile kommunen .

Oppsummering :

Det finst rikeleg med informasjon og dokumentasjon om Inn på tunet . Skal Inn på tunet ha ei framtid i Lindås kommune,kan ein ikkje basera seg på lokale eldsjeler. Me ber difor om at IPT no vert forankra i samfunnsdelen i kommuneplanen,slik at Inn på tunet tenester vert ein del av mangfaldet i kommunen sin verktøykasse. Dei ulike IPT-tiltaka må så konkretiserast i kommunale delplanar.

Seim 09.02.2017

Arne Kvamme

Solveig Laumark-Møller

Reidar Konglevoll